



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.346/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët Kymete Kicaj - kryesues, Hidajete Gashi Alaj dhe Arsim Hamzaj anëtarë, duke vendosur lidhur me ankesën e Esat Ejupi, kandidat për anëtarë të kuvendit komunal në Komunën e Podujevës, nga radhët e Subjektit Politik Lidhja Demokratike e Kosovës (LDK), me seli në Prishtinë, dega në Podujevë, të paraqitura kundër Komisionit Qendror të Zgjedhjeve (KQZ), për shkak të mungesës së votave, për Zgjedhjet Lokale në Republikën e Kosovës të mbajtura me datën 12 Tetor 2025, në seancën e panelit të mbajtur, më datë 27.10.2025, merr këtë,

V E N D I M

REFUZOHET E PABAZUAR ankesa ZL.Anr.346/2025, e datës 24.10.2025, e parashtruar nga Esat Ejupi, kandidat për anëtarë të kuvendit komunal në Komunën e Podujevës, nga radhët e Subjektit Politik Lidhja Demokratike e Kosovës (LDK), me seli në Prishtinë, dega në Podujevë, të paraqitura kundër Komisionit Qendror të Zgjedhjeve (KQZ), për shkak të mungesës së votave, për Zgjedhjet Lokale në Republikën e Kosovës të mbajtura me datën 12 Tetor 2025

A r s y e t i m

Më datë 24.10.2025, PZAP-i ka pranuar ankesën ZL.Anr.346/2025, nga Esat Ejupi, kandidat për anëtarë të kuvendit komunal në Komunën e Podujevës, nga radhët e Subjektit Politik Lidhja Demokratike e Kosovës (LDK), në të cilën theksohet se pas përfundimit të procesit të numërimit të votave të ardhura me postë, është konstatuar se një numër i konsiderueshëm i votave rreth 24 vota nuk figurojnë në kutitë përkatëse. Këto vota janë dërguar nga familjarë të ngushtë, shoqëri e afërt dhe anëtarë tjerë të regjistruara në listën zgjedhore. Tutje në ankesë theksohet se pavarësisht se këto vota janë dërguar brenda afateve ligjore dhe në përputhje me

procedurat e parashikuara nga Komisioni Qendror i Zgjedhjeve, gjatë numërimit të tyre është vërejtur mungesa e tyre e pashpjegueshme. Kjo gjendje ngre dyshime të bazuara se ka pasur mos regjistrim, humbje ose trajtim të pasaktë të këtyre fletëvotimeve, çka përbën shkelje të drejtpërdrejtë të ligjit dhe të parimeve themelore të procesit zgjedhor.

Po ashtu parashtruesi thekson se sipas Ligjit për Zgjedhjet e Përgjithshme në Republikën e Kosovës, çdo qytetar me të drejtë vote duhet të ketë mundësinë që vota e tij të pranohet, të numërohet dhe të reflektohet në rezultatin përfundimtar. Mos regjistrimi ose zhdukja e rreth 24 votave bie ndesh me nenin 4 të Ligjit, i cili garanton barazinë e votës dhe respektimin e

vullnetit të qytetareve, standardet ndërkombëtare për zgjedhje të lira dhe të ndershme, të sanksionuara edhe nga Konventa Evropiane për të Drejtat e Njeriut.

Kjo parregullsi, përveçse cenon të drejtën e qytetarëve për të votuar, dëmton drejtpërdrejt rezultatin zgjedhor duke ndikuar direkt në mandatin tim dhe në përfaqësimin real të vullnetit të zgjedhësve. Parashtruesi i ankesës kërkon nga PZAP që të urdhërojë verifikimin e plotë të procesit të pranimit, ruajtjes dhe numërimit të votave me postë për Komunën e Podujevës, me qëllim të identifikimit të shkaqeve të mos pasqyrimit të rreth 24 votave.

Në përgjigjen në ankesë KQZ-ja, thekson se me datën 03.09.2025, KQZ ka miratuar Procedurën Standarde të Veprimit për Votimin Jashtë Kosovës dhe Vlerësimin e Pakove me Fletëvotime. Në faqen 14 të kësaj procedure shpjegohet mënyra e vlerësimit të pakove me fletëvotime, ndërsa pas përfundimit të procesit të verifikimit të zarfeve me fletëvotime, DSHV dorëzon në QNR listën e votuesve të cilët kanë votuar përmes postës dhe zarfet me fletëvotime të ndara në kuti sipas komunave të votuesve.

Bazuar në nenin 17 të Rregullores Zgjedhore nr. 17/2024 për Regjistrimin dhe Votimin Jashtë Kosovës parashihet numërimi i fletëvotimeve të dërguara me postë, sipas të cilës: 17. Fletëvotimet që janë dërguar përmes postës dhe fletëvotimet që janë hedhur në kutitë e votimit nga procesi i votimit në përfaqësinë diplomatike, numërohen në QNR.

Rezultateve, parashihet procedura e numërimit të fletëvotimeve në QNR, përkatësisht, në paragrafin 9 të nenit 20 parashihet se: Zarfet e votimit me postë hapen dhe numërohen pas përfundimit të krahasimit të listave votuese të përcaktuara në nenin 18 të kësaj rregullore si dhe pas përfundimit të numërimit të votave në përfaqësi diplomatike,

Procesi i numërimit të votave në Qendrën e Numërimit dhe Rezultateve (QNR) është zhvilluar në përputhje me Rregulloren Zgjedhore Nr. 14/2024, Qendra e Numërimit dhe Rezultateve (QNR) ku ekipet e numërimit kanë bërë numërimin e votave të kandidatëve në transparencë të plotë, ku fletëvotimi është prezantuar në ekran dhe është parë nga vëzhguesit e akredituar.

Krahas fletëvotimeve, në ekran është prezantuar edhe pamja e sistemit elektronik ku figurojnë numrat e kandidatëve të cilët regjistrohen në sistem.

Rezultatet përfundimtare të procesit zgjedhor, shpallen nga KQZ-ja pas përfundimit të numërimit të gjitha fletëvotimeve nga vendvotimet e rregullta; fletëvotimeve nga votimi me kusht; fletëvotimet nga votimi i personave me nevoja të veçanta; fletëvotimeve nga votimi jashtë Kosovës; vendosjes për ankesat eventuale nga PZAP dhe Gjykata Supreme dhe pas përfundimit të të gjitha procedurave në QNR, ku rezultati i publikuar është i ankimeshëm nga subjekte politike dhe kandidatët të cilët kanë pretendime në raport me numërimin e votave të tyre.

Pra, në momentin e publikimit të rezultateve përfundimtare nga, KQZ-ja, palët e pakënaqura në pajtim me nenin 105 të LPZ, mund të ushtrojnë ankesë në afatin brenda dyzet e tetë (46) orëve në PZAP.

Paneli Zgjedhor për Ankesa dhe Parashtresa - PZAP, pas shqyrtimit të ankesës dhe shkresave të lëndës konstaton se:

Ankesa është e pabazuar

Pas shqyrtimit të pretendimeve ankimore dhe përgjigjes në ankesë të KQZ-së, vlerësoj se pretendimet në ankesën e parashtruar nga Esat Ejupi, kandidat për anëtarë të kuvendit komunal në Komunën e Podujevës, nga radhët e Subjektit Politik Lidhja Demokratike e Kosovës (LDK), të paraqitura kundër KQZ-së, me pretendimet se pas përfundimit të procesit të numërimit të votave të ardhura me postë, është konstatuar se një numër i konsiderueshëm i votave rreth 24 vota nuk figurojnë në kutitë përkatëse, të dërguara nga familjarë të ngushtë, shoqëri e afërt dhe anëtarë tjerë të regjistruara në listën zgjedhore, Paneli vlerësoi se janë të pa qëndrueshme dhe si të tilla i refuzoj për faktin se nga pretendimet e theksuara në ankesë se ka mungesë të votave të publikuara me numrin real të votave të konfirmuara nga familjarët e tij, paneli nuk ka arritur që të vërtetoj se ka pasur shkelje apo parregullsi për të cilat pala ankuese pretendon me ankesën e tij, kjo pasi që paraqitësi i ankesës edhe pse ankesës i ka bashkangjitur një liste me emrat votuesve dhe qytetet prej nga kane votuar por nuk i ka bashkangjitur ankesës prove tjetër bindëse dhe te qarte andaj ankuesi nuk ka arritur me ankesë të argumentoj pretendimet e tij se i mungojnë votat, ndërsa pretendime e theksuara në ankesë tani për tani mbeten në nivel të supozimit nga se këto pretendime nuk janë faktuar me prova konkrete.

Sa i përket pretendimeve të palës ankuese që kanë të bëjnë me votimin jashtë vendit, konkretisht me pretendimin se mungojnë 24 vota të familjarëve të tij që jetojnë në Gjermani, sipas vlerësimit

të panelit e bazuar në nenin 4 paragraf 1.3 të LZP, liria dhe fshehtësia e votës janë të garantuara, gjer sa shpërfaqja e vullnetit të votuesve në parim cenon fshehtësinë votës.

Andaj Paneli vlerësoi se pretendimet e tilla janë të përgjithësuara, të pa argumentuara dhe të pa qëndrueshme dhe si të tilla i refuzoj, për faktin se numërimi i votave të ardhura nga diaspora ka qene një proces transparent që ka mundur të përcillet nga çdo kush, mirëpo duhet pasur parasysh se një numër i votave të ardhura nga diaspora kanë rezultuar të pavlefshme. Kështu që bazuar në të lartcekurat konkludohet se nga veprimet e përshkruara në ankesë, parashtruesi i ankesës nuk ka arritur që të vërtetoj se ka pasur veprime që janë shkelur dispozitat ligjore të Ligjit për Zgjedhje apo të Rregullave Zgjedhore të KQZ-së.

Duke marrë parasysh të lartpërmendurat, Paneli vlerëson se parashtruesi i ankesës në mbështetje të pretendimeve të tij, nuk ka ofruar dëshmi të qarta dhe bindëse, edhe pse në bazë të nenit 117 paragrafi 3 të Ligjit Nr.08/L-228 Për Zgjedhjet e Përgjithshme në Republikën e Kosovës, barra e të provuarit bie mbi ankuesin, në të cilin nën përcaktohet se *“Vendosja për ankesat nga PZAP-ja mbështetet në dëshmi të qarta dhe bindëse”*.

Nga arsyet e theksuara më lartë dhe duke u bazuar nën 117 paragrafi 3, lidhur me nenin 118 paragrafi 1 të Ligjit Nr.08/L-228 Për Zgjedhjet e Përgjithshme në Republikën e Kosovës, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.Anr.346/2025 më datën 27.10.2025

Kryesues i Panelit

Kymete Kicaj



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.